

**Date – 11/09/2024**

**Time - 18:30 Hrs**

1. Environment, Forests & Climate Change Department chuan ramngaw leh nungcha te humhalhna kawnga nunna chan ta te hriatrengna ni ‘National Forest Martyrs Day’ vawiin khan an hmang.
2. Vaihhlo leh a kaihnawih that lohzia inhrilh hriatna ni State Anti Tobacco Day tum 11 na chu Mizoram hmun hrang hrangah hman a ni.
3. Prime Minister Narendra Modia chuan vawiinah SEMICON India, Greater Noida ah a hawng.
4. President Draupadi Murmu-i chuan vawiin khan New Delhi-a Rashtrapati Bhavan-ah ramchunga Nurse chawimawina Florence Nightinglae Award 2024 a sem.

<><><>

### **NATIONAL FOREST MARTYRS DAY**

Environment, Forests & Climate Change Department chuan ramngaw leh nungcha te humhalhna kawnga nunna chan ta te hriatrengna ni ‘National Forest Martyrs Day’ vawiin khan an hmang a,

State Forest Training Institute, Aizawl Bethlehem Vengthlang-ah Forest Minister Pu Lalthansanga leh Pu AK Biswal, Principal Chief Conservator of Forests hovin an hmang.

He hunah hian EF&CC Department chuan an thawhpui te duty laia boral mi 12 – Pu Lalzawmliana, Wildlife Guard, Dampa Tiger Reserve; Pu Lalsiamliana, Forester, Durtlang; Pu Lalnunzira, Forester, College Veng; Pu R.L Zoliana, Tuikual South; Pu Zatluanga, Wildlife Guard, Darngawn; Pu K. Lallawmkima, Forest Guard, Kolasib; Pu Laithansanga, Forest Guard, Khuruhlian; Pu Vanlaltluanga, Deputy Ranger, Kawnpui; Pu B. Rothangliana, Chowkidar, Aizawl Zoo; Pu C. Lalrinkima, Forester, Lunglei; Pu C. Lalengmawia, Forest Guard, Champhai te hriatrengna leh an mahni zahna chibai bukna hun hman a ni.

National Forest Martyrs Day hi kum 2013 atang khan September ni 11-ah India ramah hman tan a ni a, September ni 11 hi kum 1730-a Bishnoi hnam mi 363 ten ramngaw an humhalh avanga an lal kuta an thih ni a ni a, hemi hriatreng nan hian September ni 11 hi National Forest Martyrs Day atan kum tin hman thin a ni.

<><><>

Unlawful Activities (Prevention) Tribunal, New Delhi chuan Sikhs for Justice (SFJ) pawl chu dan kalha pawl din a ni a ti a, Unlawful Activities (Prevention) Act, 1967 hnuaiyah kum 5 chung chu dan pawnah hnawl a nih thu a puang.

<><><>

### **MPYCC**

Congress thalai pawl, Mizoram Pradesh Youth Congress Committee chuan, Sorkarna chelhtute mipui sum hmanga an invulh nasat avangin tun hnaiah mipuiyah sum leng vak a tlem an ti.

MPYCC President Pu Laltawnliana chuan vawiin Aizawl Press Club ah thuthar thehdarhtute kawmin, ZPM sorkar chu an intiam anga awm lovin Chief Minister chuan motor pakhat bak a mamawh ve dawn lo a ti a, Sorkar motor thar lei loh tur

chungchanga ZPM CM, Minister leh MLA te a hmahruaitu an ni ang, tia a sawi chu mipui bumna, Lal chak leh Lal duh luat avanga mipui Vote an dilna mangkhawng mai a ni, a ti a, sorkarna chelh tu ten mipui sum hmanga a invulh nasat avang hian nasa taka ruihhlo tawlh a ti hluarin khawlaiah kuhva lei ang maia lei tur a awm mek a, nitin ruihhlo man, ruk ruk, in suam, in thah, in rawk, ruangchhar, pawngsual leh سوالنا dang a ti pung hle a ti a, heng te hi sorkar sum enkawl thiam lohina a hrin chhuah a ni a ti.

MPYCC hotute chuan Chief Minister vengtu Police-te chuanna Escort Vehicle atana chhuanlam siamin Chief Minister hman tur cheng nuai 17 man Mahindra Thar pathum, a vai a belhkhawm a cheng nuai 51 man lei a nih thu te, Mizoram Legislative Assembly Speaker motor leina atan cheng nuai 28 leh a chenna Quarter chei thatna atan cheng nuai 23, a pahnih a belhkawmin cheng nuai 51 hman a nih bakah, Cabinet Minister leh Minister of State thenkhatte mimal in chei thatna atan cheng nuai 110 tel teh meuh hman a nih thu te sawiin sokar hnathawk ten hlawh an lak theih loh lai leh tun hma lama sorkar lo awm tawhten an tih duh loh mipui phur ti rit tura tuialhthei chhiah leh road maintenance cess thlenga an tipung chu mipui zahlohna leh palzutna dik taka an ngaih thu an sawi.

<><><>

## **ANTI TOBACCO DAY**

Mizorama vaihhlo leh a kaihhnawih that lohzia inhrilh hriatna ni State Anti Tobacco Day tum 11 na chu Mizoram hmun hrang hrangah hman a ni.

Health Minister Pi Lalrinpuii chuan he ni puala Lunglei Civil Hospital tuala inhawm tawi buatsaih a hmanpui a, thu sawiin, hemi ni puala Lunglei khawpui chhunga vaihhlo leh a kaihhnawih that lohzia mi te hrilh hre tura zirlai naupang kawng zawh turte chu zuk leh hmuam a fihlim tur leh, a ti mek an awm a nih pawhin sim turin a chah a, kawng zawh huaihawt chuan vaihhlo leh a kaihhnawih that loh zia mipuite thinlunga a tuh ngei a beisei thu a sawi bawk.

Kolasib-ah pawh Mizoram State Anti-Tobacco Day' tum 11-na leh World Suicide Prevention Day pualin Govt Kolasib High School-ah hun hman a ni a. Vaihhlo leh a kaihhnawih that loh zia chungchangah Pi Sylvie Zomuanpuii, Social Worker, NTCP, Kolasib chuan zirtirna pe in "Natna inkaichhawn theih loh avanga thihna thleng thin ah, zuk leh hmuam kaihhnawih chu a tam thu leh a in kungkaih thin thu a sawi a, Zuk leh hmuam chu ngawlveina chikhat a nih thu te, a ti tawhte pawhin an nghei thei tawh mang lo niin a sawi a, hei vang hian sorkar laipui pawh a mangan thu leh a la ti ve lo te venhim kawngah hma a lak thu a sawi. He hunah hian zirlaite chuan vaihhlo zuk leh hmuam ti lo tur leh midang pawh zuk leh hmuam laka fihlim tura zirtirna thutiam an sawirual a ni.

He hunah hian Pi Ngaihawmi Khenglawt, Psychiatric Social Worker, District Mental Health Programme, Kolasib pawhin World Suicide Prevention Day chungchang sawifiahin "World Health Organisation-in rilru hriselna a sawifiah dan chu mahni theihna hriatchiana, mihringte nuna harsatna hrang hrang tawh thin chinfel thiam te, hnathawh leh tihur hrang hrang tih theih leh khawtlanga mi hnawksak nih loh hi a ni, a ti. Rilru hrisel lo te chu an ei leh in a mumal lova, an rilru a hah avangin anmahni an in dawm kun a, ngaihtuahna an hman nasat avangin chhun leh zanah an mu thei lo tih sawiin heng bakah hian mahni awmdan an theihngilh thin thu leh ruihhlo khawih thinte zingah mahni intihlum an tam tih a sawi bakah rilru hrisel lohna thlen theitu hrang hrang pawh a tarlang bawk.

Data-a tarlan a nih danin Mizoram-ah January leh June 2015 inkar chhung khan mahni nunna la thla tin mi pakua awm anga chhut a ni a, an intihlum chhan ber chu depression niin kum 2020 leh kumin 2024 inkarah mi 390 chu mahni nunna la an awm leh tawh bawk a, hengah hian hmeichhia aiin mipa intihlum chu za a 85 zetin an tam bawk.

Mamit a State Anti Tobacco Day puala ANM School Auditorium-a hun hmanah he hun hmanpuitu Pu Jacob Lalawmpuia chuan zirlaite chu zuk leh hmuam dona kawngah hmalatu pawimawh tak an nih thu sawiin, chhungkua leh khawtlang mai ni lo Mamit district tan danglamna thlentun an ni thei a ti a. Zuk leh hmuam simna tura thil tih theih hmasa ber chu mahni thil tih pawm a nih thu leh chu chuan mihringte hmasawna kawng hmasa ber a zawh tir a ni, a ti.

State chung hmun dangte rualin Serchhipah pawh vawiin chawhnu khan vaihhlo leh a kaihhnawih that loh zia leh mahni nunna lak chungchangah-te CMO Conference Hall Serchhipah hun hman a ni a, He hunah hian 11th Mizoram State Anti Tobacco Day 2024 puala Serchhip Sub Hqrs YMA hnuaiia YMA Branch ten "Zuk leh hmuam, Ruihhlo laka naupang venhim" tih thupui hmang a Video Clip tawi insiam siak a titha te hnenah lawmman semna hun hman bawk niin, National Tobacco Control

Proagrame (NTCP) Serchhipa Counsellor Maria VL Neihlui kaihhruaiin, Zuk leh Hmuam leh Ruihhlo laka filhlim tur a intiamna neih a ni bawk.

<><><>

## COOPERATION MINISTER

Cooperation Minister Pu PC Vanlalruatan Sorkar thar ‘Kalphung thar Mizoram chhunga thlen tura thawhpuih federation-te a sawm.

Vawiina Mizoram Vandhan Vikas Kendra VDVK Outlet Babutlang Aizawla a hawna ah sawiin Co-Operation Cooperation Minister Pu PC Vanlalruata chuan Department hnuuia Federation-te chu tunlai khawvel hmasawna thang zel mila an kal leh an inherrem zel a pawimawh thu a tarlang a. Khawvel khawi ramah pawh, Federation leh Cooperative Society-te an changtlunna apiang chu ram nuam leh hmasawn chak ber berte an ni zel tih a sawi a. Hei bakah hian Minister chuan ramin hma a sawn tak tak theihna tur chuan Federation leh Department-te thawhhona tha chu thil pawimawh ber pakhat a nih thu tarlangin, hemi atan hian inrawnkhawmna mumal tak la buatsaih a tul tih a sawi a ni.

Pradhan Mantri Janjatiya Vikas Mission (PMJVM), Van Dhan Mission tih bawk chu Mizoramah kum 2020 january ni 23 atang khan Cooperation Department chuan a kalpui tan a, he Scheme hnuuia hian Van Dhan Vikas Kendra (VDVK) 259 din tawh niin, heng VDVK-te hnenah hian training bakah hmanrua leh chakkhai an mamawh angte a thlawn vekin pek a ni a, heng operational VDVK-te thil siam chhuah hrang hrangte pho chhuah sak hi Cooperation Department ngaih pawimah a ni.

Tun dinhmunah a bul tan nan VDVK 32 te thil siam chhuah hrang hrangte chu la khawmin heng thil siam chhuahte a tul anga pho chhuahna atan hian RCS Office ground floor-ah Mizoram VDVK Outlet hi siam a ni.

<><><>

## SAITUAI SP

Kum 1959 October 21-a ramria India leh China inhmuh thiam loh avanga India sipai patrol lai mi 10, China sipaiin an lambun a, nunna an channa hmun Hot Springs an tih mai, Leh Ladakh-ah India rama Police thlan bikte chuan tunthla ni 3 khan Martarte zahna chibai bukin hriatrengna hun an hmang a, Mizoram State aiawhin Saitual SP Pu Pukhraj Kamal he hmunah hian a kal.

Pu Pukhraj Kamal chuan he hmunah hian ram chhan nana nunna hlantute avangin ram chhung hmun hrang hrang atangin tkan kalkhawm tih a sawi a, Sipai nunna hlantute, an huaisenna leh ram tana an inpekna hi t hangthar ten kan hre reng tawh anga, mahni inphata ram tana nunna hlantute sulhnu hian min tichak thar se, ram leh hnam tan theihtawp kan chhuah zel dawn a ni a ti a.

Pu Manoj Yadav, DG Railway Protection Force (RPF) kaihhruaiin India hmun hrang hrang atangin Police leh Force thlan bik mi 28 he hmunah hian an zin a. Martarte puala hun hmannaah hian a kalten hriatrengna thlan siamah zahna pangpar dahin ngawi rengin minute 1 an ding a, Kum 1959-a China-in India sipai an kah laia la dam zinga mi Sanam Dorjey kum 86 mi chu he hunah hian khual thaah telin thil thlen dan a sawi a ni.

<><><>

## PM SEMICON

Prime Minister Narendra Modia chuan vawiinah SEMICON India, Greater Noida ah a hawng. Thusawiin Prime Minister Modia chuan tunlai hunah chuan silicon indawrna hi a pawimawh tawh a, hei vang hian India pawh semiconductor siamchhuahna hmunpui ni turin a inbuatsaih mek a ti a. Ramchhunga electronics leh semiconductor industry ti lian tura sawrkar hmalakna hrang hrang a tarlang a. Tun atanga kum 10 a liam chuan electronic bikah dollar tluklehdingawn 500 hu industry ramchhungah din a ni tawh ang a ti a. Hei hian hna thar nuai 60 chuang a siam dawn a ni a ti bawk.

Pu Modia chuan Digital India hmalakna taarlangin ramin a rah tam tak a tel mek a ti a. Tunhma chuan mobile phone hi ram pawn atanga lakluh a ni thin a, tunah erawh India hi khawvela mobile phone siam chhuak hnem ber dawttu a ni tawh a ti bawk.

SEMICON India thlirlawkin nimirn tlai khan PM Modi-a chenna inah Semiconductor Executives Roundtable an thukhawm a. Pu Modia chuan India chu khawvela semiconductor supply tu zingah ramdang tana thawhpui rintlak tak a ni thei tih a sawi a. Semiconductor chu Digital khawvel inngahna anih thu sawiin hun reiloteah semiconductor industry chu mamawhna a sang hle dawn a ni a ti a. Mipui rorelna democracy leh technology tangkawp chuan mihringte tan thil tha tam tak a pe thei tih sawiin India pawhin semiconductor sector lamah khawvel hriat a hlawh chho mek a ni a ti bawk.

Vawiina SEMICON India 2024 ah hian khawvel ram hruaitute, company leh semiconductor lama mithiam tak tak an lo kalkhawm dawn a. Exhibitor 250 leh thusawitu mi 150 chuang an awm dawn a ni.

<><><>

**FLORENCE NIGHTINGALE**

President Draupadi Murmu-i chuan vawiin khan New Delhi-a Rashtrapati Bhavan-ah ramchhunga Nurse chawimawina Florence Nightingale Award 2024 a sem. National Florence Nightingale Award hi kum 1973 khan Union Ministry of Health and Family Welfare chuan a sem tan a. Ramchhunga nurse thawk thate hnenah hlan thin a ni.

Mizoram atangin Serchhip District Hospital-a Ward Superintendent ni lai H. Mankimi pawhin Florence Nightingale award hi dawng a ni.

<><><>